

Huc accedebat immenso opere atque impensa recens navigium, ad veteris jam vetustate collapsi formam extructum (*Bucentaurum* vocant) quibus sane anniversaria mare desponsandi pompa illustrior reddebatur. Conscendit una cum Senatoribus Princeps, Regum Principumque oratoribus, atque ipsomet Horatio Matthæjo, Pauli Nuntio, latera stipantibus. Bucentaurum triremes aliquot, biremes, celoces, atque infinitus propemodum cymbarum numerus, lætis acclamationibus prosequabatur. In ea vero celebritate mirum omnibus videbatur, in amplissimum Senatum, in civitatem innumeris prope mortalibus refertam, religione insignem, in tot oppida atque urbes, nulla graviori causa adductum, adeo lævire Pontificem decrevisse. Cuncti in Matthæjum oculos conjicere, atque moderationem Senatus extollere, quod, quo tempore anathemate a Pontifice feriiebatur, eodem perhumaniter ejus Nuntius exciperetur, Principique adsideret. At Matthæjus, qui neque civilium rerum usu, neque humanarum cognitione præstabat, verecundia veluti perfusus hære, paucaque fari: *Adbuc concordie, si hinc atque inde, proclinatis ad pacem animis, nonnihil remitteretur, locum esse.* Matthæji verba in Senatu recitata, absque responso dimittenda Patres non esse, censuere. Itaque ei publico decreto significatur: *Ingentem ac neutique dissimulandam ex Pontificis insueta agendi ratione molestiam Rempublicam percepisse, indigne cum ea actum esse: ceterum si anathema Pontifex sustulerit, quin de his rebus agatur, minime Senatum recusaturum.* Multa Donatus Princeps subnectit: *Neque minis, neque anathemate cum Principibus agendum: periculorum impendentium culpa Rempublicam immunem fore: jam in vetera illius instituta, leges, fundamenta impetum factum; de iisque profligandis, convellendis ac prorsus tollendis actum.* At in hoc (inquit Matthæjus) error versatur, quod temporariam jurisdictionem eripere Reipublicæ Paulus nolit; tantum, ut leges adversus ecclesiasticam libertatem conditæ abrogentur, petit. Ad ea Donatus: *Jam se ætatem fere in maximarum rerum negotiis pertractandis exegisse: multa Romæ difficillimis temporibus*